

Versión 12/07/2016

RESOLUCIÓN/ORDE DA (.....) POLA QUE SE REGULA O PROCEDIMENTO DE COBERTURA TEMPORAL DE POSTOS DE PERSOAL FUNCIONARIO SANITARIO DA ESCALA DE SAÚDE PÚBLICA E ADMINISTRACIÓN SANITARIA (LEI 17/1989, DO 23 DE OUTUBRO).

(....)

I. NORMAS XERAIS

I.1. Obxecto

Esta Resolución/Orde establece e regula o procedemento de selección das persoas aspirantes, a través de listas elaboradas consonte a baremo así como a xestión de chamamentos para a cobertura con carácter temporal dos postos de traballo de persoal funcionario sanitario da escala de saúde pública e administración sanitaria da Comunidade Autónoma de Galicia, creada pola *Lei 17/1989, do 23 de outubro*.

I.2. Ámbito de aplicación

A regulación contida na presente Resolución/Orde aplicarase a todos os nomeamentos temporais que resulte necesario formalizar nas diversas clases de persoal funcionario da escala de saúde pública e administración sanitaria, cuxa xestión é competencia da Consellería de Sanidade e do Servizo Galego de Saúde.

II. SELECCIÓN DAS PERSOAS ASPIRANTES

II.1. Ámbito de inscrición

Para a cobertura temporal de postos reservados a persoal funcionario da escala de saúde pública e administración sanitaria da Lei 17/1989, do 23 de outubro, elaborárase unha

única lista, por cada un dos colectivos profesionais que a continuación se indican, que terá ámbito de comunidade autónoma.

- Clase de inspector/a médico/a
- Clase de inspector/a farmacéutico/a
- Clase de farmacéutico/a inspector/a de saúde pública
- Lista xeral de licenciado/a sanitario/a: licenciado en medicina e cirurxía, licenciado en farmacia, licenciado en ciencias químicas, licenciado en ciencias biolóxicas, licenciado en psicoloxía.
- Clase de subinspector/a sanitario/a
- Clase de ATS/DUE

II.2 Baremo aplicable

A ordenación das persoas aspirantes na lista efectuarase consonte a prelación que resulte da aplicación do seguinte baremo:

a) Experiencia profesional

a.1) Por cada mes completo de servizos prestados en postos da mesma clase á que opta na Administración da Xunta de Galicia ou en postos, prazas ou funcións de corpos homólogos noutras administracións sanitarias de España ou resto de UE/Suiza e Espazo Económico Europeo: **0,15 puntos**.

Na lista xeral de licenciado/a sanitario/a terán a consideración de servizos prestados na mesma clase os prestados indistintamente nas clases de licenciado/a en medicina e cirurxía, licenciado/a en farmacia, licenciado/a en ciencias químicas, licenciado/a en ciencias biolóxicas e licenciado/a en psicoloxía.

a.2) Por cada mes completo de servizos prestados en clase distinta á que opta, de inscrición compatible, na Administración da Xunta de Galicia ou en postos, prazas ou funcións de corpos homólogos noutras administracións sanitarias de España ou resto de UE/Suiza e Espazo Económico Europeo: **0,075 puntos**.

A puntuación máxima a acadar neste apartado será de 40 puntos

b) Coñecemento do idioma galego

Valorarase neste apartado o coñecemento polos/as aspirantes do idioma galego no nivel celga 4 ou equivalente conforme certificación oficial regulada na Orde do 16 de xullo de 2007 (D.O.G nº 146, do 30 de xullo), segundo modificación efectuada pola Orde do 10 de febreiro de 2014, cunha puntuación de 5 puntos.

A aqueles aspirantes das clases de inspector/a médico/a, inspector/a farmacéutico/a, farmacéutico/a inspector/a de saúde pública e subinspector/a sanitario/a que non estean en posesión do diploma acreditativo do coñecemento do idioma galego celga 4 ou equivalente e tivesen participando na última convocatoria de concurso oposición para o acceso á clase, efectuada polo Servizo Galego de Saúde, valoraráselles neste apartado a puntuación acadada no exercicio de galego, tivesen ou non superado este, coa ponderación que corresponda sobre o máximo de 5 puntos.

c) OPE

As persoas aspirantes das clases de inspector/a médico/a, inspector/a farmacéutico/a, farmacéutico/a inspector/a de saúde pública e subinspector/a sanitario/a valoraráselles as cualificacións obtidas en cada un dos exercicios da fase de oposición, agás galego, do último proceso de selección fixa convocado polo Servizo Galego de Saúde para a clase na que solicita a súa inscrición coa ponderación que corresponda sobre o máximo de 55 puntos.

A puntuación deste apartado obterase logo da suma das cualificacións obtidas polo/a aspirante no proceso selectivo multiplicado por 55 e dividido pola puntuación máxima acadable na fase de oposición.

A estes efectos, entenderase como data de finalización do proceso selectivo a data de publicación no Diario Oficial de Galicia da resolución pola que se declara rematada a fase de oposición do respectivo proceso.

A asignación da puntuación correspondente a este apartado efectuarase de oficio pola Administración, sen que a persoa aspirante deba presentar ningunha documentación acreditativa.

II.3 Desempate

Os empates de puntuación que se puidesen producir resolveranse en primeiro lugar a favor da persoa aspirante que acadase a maior puntuación na fase de oposición, naquelas clases que valoren este mérito no baremo. De persistir o empate, resolverase a favor da persoa que acredite maior puntuación no apartado de experiencia profesional, a continuación aplicarase o criterio de maior idade e, en último lugar terase en conta a letra vixente no resultado do sorteo para participar en procesos selectivos do ano natural anterior.

II.4 Procedemento de inscrición e elaboración das listas

A inscrición das persoas aspirantes nas listas así como a súa elaboración efectuarase consonte o procedemento regulado nos apartados II.4.1 a II.4.4 da Resolución do 13 de xuño de 2016 da Dirección Xeral de Recursos Humanos do Servizo Galego de Saúde, pola que se dispón a publicación do Pacto sobre selección de persoal estatutario temporal do sistema público de saúde de Galicia (*Diario Oficial de Galicia n.º 123, do 30 de xuño*) ou disposición equivalente que o substitúa.

II.5 Requisitos das persoas aspirantes

Poderán inscribirse nas listas que se elaboren en aplicación desta Resolución/Orde as persoas interesadas que reúnan os seguintes requisitos:

a.- Ter nacionalidade española ou algunha outra que, consonte o disposto no artigo 52 da Lei 2/2015, do 29 de abril, de emprego público de Galicia, permita o acceso ao emprego público.

b.- Estar en posesión da titulación exixida ou estar en condicións de a obter.

No caso de titulacións obtidas no estranxeiro, deberán posuír o documento que acredite fidedignamente a súa homologación ou a credencial de recoñecemento do título para efectos profesionais.

c.- Non ter sido separado mediante expediente disciplinario do servizo de ningunha Administración Pública ou dos órganos constitucionais ou estatutarios das comunidades

autónomas, nin atoparse na situación de inhabilitación absoluta ou especial para o desempeño de empregos ou cargos públicos por resolución xudicial, cando se trate de acceder ao corpo ou escala de persoal funcionario do cal a persoa foi separada ou inhabilitada.

No caso do persoal laboral, non ter sido despedido mediante expediente disciplinario de ningunha Administración pública ou dos órganos constitucionais ou estatutarios das comunidades autónomas, nin atoparse na situación de inhabilitación absoluta ou especial para o desempeño de empregos ou cargos públicos por resolución xudicial, cando se trate de acceder á mesma clase á cal se pertencía.

No caso de nacionais doutros estados, non estar inhabilitado ou en situación equivalente, nin ter sido sometido a sanción disciplinaria ou equivalente que impida no Estado de procedencia o acceso ao emprego público.

d.- Ter cumpridos os dezaseis anos e non exceder a idade máxima de xubilación forzosa.

e.- Posuir as capacidades e aptitudes físicas e psíquicas necesarias para o desempeño das correspondentes funcións ou tarefas.

Os requisitos deberán reunirse na data de formalización da inscrición e manterse no momento da formalización do oportuno nomeamento

As persoas aspirantes poderán modificar os seus datos persoais a través de Fides/expedient-e (www.sergas.es), en calquera momento, producindo efectos na xestión das listas desde o día seguinte ao da data de modificación.

II.6 Baixa automática do persoal funcionario de carreira

O persoal de novo ingreso, en virtude do remate dun proceso selectivo, será dado de baixa automaticamente como aspirante a nomeamentos temporais na clase en que adquire a condición de persoal funcionario de carreira.

II.7 Compatibilidade de listas

Admitirase a compatibilidade de inscrición nas seguintes listas:

Bloque 1)

Inspector/a farmacéutico/a, farmacéutico/a de saúde pública e licenciado sanitario.

Bloque 2)

Inspector/a médico/a e licenciado sanitario.

Bloque 3)

Subinspector/a sanitario/a e ATS/DUE

III. XESTIÓN DE CHAMAMENTOS

III.1. Órgano competente

O chamamento das persoas aspirantes efectuarase pola Dirección Xeral de Recursos Humanos do Servizo Galego de Saúde.

A formalización do nomeamento efectuarase por este mesmo órgano.

III.2. Procedemento

III.2.1 Na xestión de chamamentos das persoas aspirantes respectaranse as disposicións contidas nos apartados III.2, III.3, III.4 e III.6 da Resolución do 13 de xuño de 2016, da Dirección Xeral de Recursos Humanos do Servizo Galego de Saúde, pola que se dispón a publicación do Pacto sobre selección de persoal estatutario temporal do Sistema público de saúde de Galicia (*Diario Oficial de Galicia n.º 123, do 30 de xuño*) ou disposición equivalente que o substitúa.

III.2.2 Para o desenvolvemento de postos reservados na relación de postos de traballo ás clases de inspector/a médico/a, inspector/a farmacéutico/a, farmacéutico/a inspector/a de saúde pública, subinspector/a sanitario/a ou ATS/DUE, efectuarase o chamamento ao aspirante que, pola orde lle corresponda, na lista respectiva.

III.2.3 Para a cobertura temporal dos postos abertos na relación de postos de traballo a distintas clases de persoal licenciado sanitario chamarase pola lista xeral de licenciado sanitario, ao primeiro aspirante que lle corresponda segundo a orde de prelación, con independencia da titulación que este posúa, agás que polo contido funcional do posto a cubrir resulte debidamente xustificado o seu desempeño por profesional dunha

determinada titulación ou clase, suposto no que o chamamento se efectuará a favor do/da primeiro/a aspirante desta lista coa titulación solicitada ou da lista específica da clase que se requira.

III.2.4 Para a cobertura dos postos de persoal licenciado sanitario que, conforme á relación de postos de traballo só poidan ser ocupados por persoal da clase de licenciado en medicina e cirurxía, licenciado en ciencias biolóxicas, licenciado en farmacia, licenciado en ciencias químicas ou licenciado en psicoloxía, chamarase ao primeiro aspirante da lista xeral de persoal licenciado sanitario que reúna o requisito de titulación esixido para o seu desempeño.

IV.- RÉXIME DE PENALIZACIÓNS

Resultará de aplicación o réxime de penalizacións contido no apartado IV da Resolución do 13 de xuño de 2016, da Dirección Xeral de Recursos Humanos do Servizo Galego de Saúde, pola que se dispón a publicación do Pacto sobre selección de persoal estatutario temporal do Sistema público de saúde de Galicia (*Diario Oficial de Galicia n.º 123, do 30 de xuño*) ou disposición equivalente que o substitúa.

A referencia ás condutas constitutivas de falta grave e moi grave da Lei 55/2003, do 16 de decembro, pola que se aproba o Estatuto Marco do persoal estatutario dos servizos de saúde substitúese polas contidas no Título IX, Capítulo II da Lei 2/2015, do 29 de abril, do emprego público de Galicia.

Disposición transitoria

En tanto non se publiquen as listas de persoas aspirantes seleccionadas en aplicación dos criterios contidos na presente Resolución/Orde, serán de aplicación respecto de cada clase e para os chamamentos que resulte necesario efectuar, as últimas listas confeccionadas e as normas de xestión contidas na regulación anterior correspondente.

O primeiro proceso de inscrición nas listas de selección temporal reguladas pola presente Resolución/Orde formalizarase previo anuncio no *Diario Oficial de Galicia*, no prazo do mes

seguinte á publicación desta Resolución. Os sucesivos procesos de xeración efectuaranse consonte o procedemento regulado na norma II da Resolución do 13 de xuño de 2016, sobre selección de persoal estatutario temporal do Sistema público de saúde de Galicia (DOG n.º123, do 30 de xuño) ou norma que o substitúa.

Disposición adicional

Se durante a vixencia da presente Resolución/Orde se convoca polo Servizo Galego de Saúde un concurso oposición para calquera das clases incluídas no seu ámbito de aplicación, o baremo incorporará a valoración das cualificacións obtidas polo/a aspirante no proceso, na porcentaxe que se indica no apartado II.2.

Da mesma forma, se durante a vixencia desta Resolución/Orde se publicase no Diario Oficial de Galicia un novo baremo para os procesos de selección fixa que engadise novos méritos distintos á experiencia profesional, este novo baremo aplicarase no seguinte proceso de xeración de listas da clase correspondente, nos mesmos termos, coa ponderación que resulte para cada un dos seus apartados sobre o máximo de 40 puntos.

Disposición derogatoria

Queda derogada a Resolución conxunta do 17 de abril de 2000, da Secretaría Xeral da Consellería de Sanidade e Servizos Sociais e da División de Recursos Humanos do Servizo Galego de Saúde, pola que se ordena a publicación do pacto asinado pola Administración sanitaria coas centrais sindicais CIG, CC.OO, UGT, CSI-CSIF e CESM-SATSE, sobre selección temporal de determinados postos de traballo de persoal funcionario da escala de saúde pública e Administración sanitaria con destino na Consellería de Sanidade e Servizos Sociais e no Servizo Galego de Saúde, e demais disposicións do mesmo ou inferior rango que se opoñan ao establecido na presente Resolución, sen prexuízo do establecido na disposición transitoria.